

Il svilup da la Pro Juventute Grischun

Pro Juventute è ina fundaziun svizra d'util public per uffants, giuvenils e famiglias cun in'istorgia da passa 100 onns. Quai è in lung temp che ha era purtà ina u l'otra midada. Uschia era l'onn 2009, cura che la fundaziun ha decis da cuntinuar l'engaschi regional cun uniuns chantunalas independentas. Ins ha fundà l'uniun Pro Juventute Grischun. En il decurs dals onns avain nus sco Pro Juventute Grischun pudì sviluppar e realisar d'ina vart en stretga collavuraziun cun la fundaziun Pro Juventute gronds projects naziunals, da l'otra vart avain nus era pudì metter en pe agens projects regionals e locals.

En il Grischun han ins pudì preschentar buns resultats. En autras parts dal pajas n'èn ils resultats betg stads tuttina satisfaschants. Plinavant ha il model da las uniuns chantunalas chaschunà custs considerabels sin tut ils nivels da la fundaziun. Per pudair s'engaschar naziunalmain a pli lunga vista ha il cussegl da fundaziun decis da concepì da nov il model d'organisaziun. En il futur vegn l'activitad organisada tenor regions per pudair rinforzar vinavant ils programs naziunals.

Ins ha discutà intensivamain ed elavurà detagliadamain differents scenaris concernent il futur da la Pro Juventute Grischun e quai cun involver da tut temp tut ils circuls, tut las commembras ed ils commembers e tut ils voluntaris da la Pro Juventute Grischun. A chaschun da la radunanza extraordinaria da las commembras e dals commembers dals 23 da matg 2020 han ins decis unanimamain da restar vinavant activ independentamain en il chantun Grischun. Quai ha per consequenza che l'uniun Pro Juventute Grischun da fin ussa s'engascha a partir dal 1. d'avust cun il nov num Pro Junior Grischun. Quai signifitga concretamain d'ina vart che la fundaziun Pro Juventute s'occupa vinavant da las purschidas naziunals sco per exempel la cussegliaziun e l'agid 147 e da l'otra vart che la Pro Junior Grischun offra projects sviluppadis e realisads sin nivel chantunal e regional.

Precis quest engaschament chantunal e local è per finir stà impurtant per la decisiun da restar activ independentamain, persunter cun il nov num Pro Junior Grischun. Sco fin ussa vulain nus esser datiers dals basegns dals uffants, dals giuvenils e da las famiglias grischunas. Per l'ina essan nus preschents fin entadim tut las vals ed ans occupain dals basegns locals grazia a nossa rait da voluntaris fitg vasta. Per l'otra pudain nus impunder, grazia ad in'administraziun effizienza e favuraivla, en ina dimensiun maximala las donaziuns preziasas confidadas a nus e quai directamain al lieu. Nus ans legrain da pudair sustegnair vinavant famiglias en situaziuns finanzialas precaras cun noss agid per cas singuls e da pudair promover sco fin ussa era projects per uffants e giuvenils cun contribuziuns finanzialas. Natiralmain cuntinuain nus cun l'organisaziun da nossas atgnas purschidas sco per exempel ils pass da vacanzas, ils curs da sa far valair ed ulteriurs projects locals pli pitschens e pli gronds sco per exempel il Di da gieus per uffants.

Il focus da nossa lavur è e resta d'identifitgar ils basegns dals uffants, dals giuvenils e da las famiglias en noss chantun e da pudair porscher svelts soluziuns correspudentas. Il pli nov exempel è la tgira dals uffants en Bregaglia, ina da las paucas regions en noss chantun che n'aveva anc nagina tgira professiunala d'uffants pitschens. La pandemia da corona ha procurà che bleras famiglias èn vegnidas en las stretgas, perquai che la tgira da fin ussa tar tat e tatta ed en l'Italia vischina n'è tuttenina betg pli stada pussaivla. Entaifer pauc temp ans èsi reüssi d'organisar ina pussaivladad da tgira ed ils 17 d'avust 2020 avain nus avert sco Pro Junior Grischun l'emprima canorta d'uffants pitschens en Bregaglia. Quai è stà pussaivel mo grazia a l'engaschi enorm, a la gronda passiun e la buna collavuraziun cun ils posts chantunals e cun la vasta rait da gidantras e gidanters.

Perquai ans legri spezialmain che tut noss voluntaris da fin uss, per part activs dapi decennis per nus, s'engaschan vinavant sin plaun local en totalmain 17 districts per Pro Junior Grischun ed uschia per uffants, giuvenils e famiglias. Ensemen cun els ans legrain nus sin las sfidas e sperain da pudair profitar vinavant dal sustegn prezios da la populaziun che ha pir pussibilità noss agir.